

MUCHANAN

riba e bon caminda...

AMEDEE POPE - Softball

Un mucha-muher sigur di su mes, cu tin hopi respet, masha social, y cu nunca sa falta scol, esey ta Amedee. E ta bin di un famia cu tambe ta gusta deporte, ya cu su tata tabata un 'star-player' den futbol, y tabata hunga basketball tambe. Su mama tampoco ta keda atras. E tabata hunga softball tambe.

El a cuminsa hunga softball tempo cu e tabata tin 9 aña, y te awe, esaki ta su deporte favorito. Amedee su equipo ta Hard Hitters (antes Tigers) y su posicion ta 1ra base, shortstop y pitcher, y tin biaha sa hunga 2da base tambe. E tin un average di 500 y ta train dos biaha pa siman.

Su fansnan mas grandi ta su mama, tata y ruman Jason. Ademá e tin su amiganan cu tambe sa bai apoya e team ora nan bai hunga. E team mes a yega di baicompeta na Puerto Rico. Na aña 1998 nan a sali Sub-Campeon aki na Aruba. Cu su coach, Marina Haynes, e tin bon contact. Sra. Haynes ta hopi activo cu nan, ta stimulá nan y e muchanan ta gusta su style di siñanan. Un conseho cu semper Amedee ta corda di su coach ta pa semper keda riba tenchi, clá pa sali.

Pero no ta deporte so ta importante pa Amedee, sino scol tambe! Su trainingnan pa softball, y tambe tennis, no ta strob'e di haci les. E ta zorg pa tur cos ta cla prome cu training, y ora training caba, e ta bolbe ripiti e les. Su 1e rapport tabata consisti di 8 cu 9 só. Y e di dos tambe e ta sigur cu lo bin bon.

Amedee no a dicidi ainda ki profesion e kier tin den futuro, tin hopi tempo ainda. Pero sigur, manera tur mucha, ta soña cu lo por drenta major league softball, y bira manera Lisa Fernandez.

Un conseho cu Amedee tin pa otro muchanan ta: "Sigui studia y haci sport! Bringa pa bo bai dilanti! Si acaso algo pasa y bo kier 'quit', no haci'é. Pensa cu: "After a rainy day, the sun always shines!"



CHRISTOPHER OWEN - Baseball

Chris tin 12 aña, y mescos cu Amedee, el a cuminsa hunga baseball cu 9 aña. E stima su deporte di baseball, y ta su omo y alavez coach, Ripoldo Croes, ta esun cu a stimul'é pa e drenta e deporte aki. E ta train tres biaha pa siman, y su posicion ta di Outfielder. Chris ta hunga pa Lipton's Tea, y awor nan ta den campeonato pa Center League. Su mihor hugada te awor aki ta cu el a score 5 homerun caba den e aña aki cu apenas a cuminsa.

Chris ta bin di un famia deportista, ya cu su tata tabata practicá hardlopen, y su mama tabata hunga softball. Su mama ta su fanático mas grandi y sa compañía Chris ora cu tempo ta permiti.

Pero no ta baseball so Chris ta hunga. E ta hunga futbol, tafeltennis y basketball tambe! Seis aña pasá el a logra sali e Most Valuable Player den futbol.

E coachnan di Chris ta ademá di Sr. Croes, Ricky Henriquez pa baseball tambe, Ale pa futbol, y Andres Krozendijk pa basketball. Tur segun Chris ta coachnan hopi 'great', y ta yudanan hopi. Di un di su coachnan di baseball e ta corda semper un bon conseho: "Tira bala riba braza, y rek man ora di batea. Y corda bira pia."

Ora cu e tin un tempo liber, e ta gusta corre bicicleta, hunga cu su cachó, pero tambe pasa tempo cu su wela cu ta malo. Chris ta bai keda hopi cerca dje pa cuid'é.

Pa loke ta trata scol, Chris ta bayendo bon, y ta trahando duro pa su segundo rapport bin mas mihor cu e prome. Su trainingnan no ta stroba Chris di haci les, ya cu e ta percura pa nan ta cla prome cu e bai train. Y si acaso e no a keda cla ainda, e ta sigui studia despues di train.

Chris ta soña sigur di yega mes leu cu Sidney Ponson of Andruw Jones, pero toch lo kier studia pa bira veterinario tambe, ya cu e tin un amor grandi pa bestia.

Un bon conseho cu Chris tin pa tur mucha ta: "No huma of droga, paso lo bo no tin rosea pa haci sport. Pone estudio semper na prome lugar, y haci cos bon so!"

CHABALITO ta gradici Sr. Krozendijk, Sr. Paim, y famianan di Christopher y Amedee pa e cooperacion cu a ser duná na nos pa haci e entrevistanan aki posibel.

Chabalito

Number 7 - Año III - Maart, 2001 - Afl. 2,=



Conoce prins Willem-Alexander • Sa mas di Paleis Het Loo • Mas y mas premio!